

四庫全書

集部

欽定四庫全書

集部

漢魏六朝百三家集卷十二

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官編修臣吳舒帷

謄錄監生臣黃鑫

欽定四庫全書

漢魏六朝百三家集卷十一

漢班固集題詞

安陵班叔皮清淨守道有二令子孟堅文章領
著作仲升武節威西域天下之奇在其一門漢
世無比仲升功名拔傳介子張騫以上孟堅晚
節竟蹶不起亡時與蔡中郎同年又以竇氏賓
客為洛陽种令所捕繫頓辱更甚私心痛其才

同厥考而志耻薄官冒進失當不若望都長優
游以終也叔皮專心史籍欲撰漢史孟堅踵就
其業為人誣訟陷身獄網伸升馳闕分明轉禍
為福危哉漢書之得成更兩世閱變故如是其
不易也兩都做上林賓戲儼客難典引居封禪
美新之間大體取象前型制以心極而師覆徒
奔反在燕然片石夫惟大雅既明且哲豈孟堅
亦讀而未之詳乎

目錄

賦

兩都賦

有序

幽通賦

終南山賦

覽海賦

遊居賦

竹扇賦

表

為第五倫薦謝夷吾表

奏記

奏記東平王蒼

牋

與竇憲牋

又

又

又

又

又

書

與弟超書

又

又

又

又

又

又

又

又

與陳文通書

議

匈奴和親議

符命

典引

有序
蔡邕註

設難

答賓戲

有序

頌

賓車騎北征頌

東巡頌

南巡頌

銘

封燕然山銘

高祖沛泗水亭碑銘

十八侯銘

鄼侯蕭何

將軍舞陽侯樊噲

將軍留侯張良

太尉絳侯周勃

將軍平陽侯曹參

丞相戶牖侯陳平

南宮侯張敖

衛尉曲陽侯酈商

將軍潁陽侯灌嬰

將軍汝陰侯夏嬰

將軍陽陵侯傅寬

將軍信武侯靳歙

丞相安國侯王陵

將軍襄平侯韓信

將軍棘津侯陳武

曲成侯蟲達

御史大夫汾陰侯周昌

將軍青陽侯王吸

論

難莊論

功德論

哀辭

馬仲都哀辭

連珠

擬連珠

五首

文

奕旨

詩

郊祀靈芝歌

詠史

竹扇詩

漢魏六朝百三家集卷十一目錄

欽定四庫全書

漢魏六朝百三家集卷十一

明 張溥 輯

漢班固集

賦

兩都賦 有序

或曰賦者古詩之流也昔成康沒而頌聲寢王澤竭而詩不作大漢初定日不暇給至於武宣之世乃崇禮官

考文章內設金馬石渠之署外興樂府協律之事以興
廢繼絕潤色鴻業是以衆庶說豫福應尤盛白麟赤鴈
芝房寶鼎之歌薦於郊廟神雀五鳳甘露黃龍之瑞以
為年紀故言語侍從之臣若司馬相如虞丘壽王東方
朔枚臯王褒劉向之屬朝夕論思日月獻納而公卿大
臣御史大夫倪寬太常孔臧大中大夫董仲舒宗正劉
德太子太傅蕭望之等時時間作或以抒下情而通諷
諭或以宣上德而盡忠孝雍容揄揚著於後嗣抑亦雅

頌之亞也故孝成之世論而錄之蓋奏御者千有餘篇而後大漢之文章炳焉與三代同風且夫道有夷隆學有麓密因時而建德者不以遠近易則故臯陶歌虞奚斯頌魯同見采於孔氏列於詩書其義一也稽之上古則如彼考之漢室又如此斯事雖細然先臣之舊式國家之遺美不可闕也臣竊見海內清平朝廷無事京師修宮室浚城隍而起苑囿以備制度西土耆老感懷怨思冀上之睠顧而盛稱長安舊制有陋洛邑之議故臣

作兩都賦以極衆人之所眩曜折以今之法度辭曰

西都賦

有西都賓問於東都主人曰蓋聞皇漢之初經營也嘗
有意乎都河洛矣輟而弗康寔用西遷作我上都主人
聞其故而覩其制乎主人曰未也願賓攄懷舊之蓄念
發思古之幽情博我以皇道弘我以漢京賓曰唯唯漢
之西都在於雍州寔曰長安左據函谷二嶠之阻表以
大華終南之山右界褒斜隴首之險帶以洪河涇渭之

川衆流之隈汧湧其西華實之毛則九州之上腴焉防
禦之阻則天地之隩區焉是故橫被六合三成帝畿周
以龍興秦以虎視及至大漢受命而都之也仰悟東井
之精俯協河圖之靈奉春建策留侯演成天人合應以
發皇明乃眷西顧寔惟作京於是睇秦嶺瞰北阜挾澧
灞據龍首圖皇基於億載度宏規而大起肇自高而終
平世增飾以崇麗歷十二之延祚故窮奢而極侈建金
城之萬雉呀周池而成淵披三條之廣路立十二之通

門內則街衢洞達閭閻且千九市開場貨別隧分人不得顧車不得旋闐城溢郭旁流百塵紅塵四合煙雲相連於是既庶且富娛樂無疆都人士女殊異乎五方遊士擬於公侯列肆侈於姬姜鄉曲豪舉遊俠之雄節慕原嘗名亞春陵連交合衆騁驚乎其中若乃觀其四郊浮遊近縣則南望杜霸北眺五陵名都對郭邑居相承英俊之域紱冕所興冠蓋如雲七相五公與乎州郡之豪傑五都之貨殖三選七遷克奉陵邑蓋以強幹弱枝

隆上都而觀萬國封畿之內厥土千里連蹠諸夏兼其
所有其陽則崇山隱天幽林穹谷陸海珍藏藍田美玉
商陸緣其隈鄠杜濱其足源泉灌注陂池交屬竹林果
園芳草甘木郊野之富號為近蜀其陰則冠以九峻陪
以甘泉乃有靈宮起乎其中秦漢之所極觀淵雲之所
頌歎於是乎存焉下有鄭白之沃衣食之源提封五萬
疆場綺紛溝塍刻鏤原隰龍鱗決渠降雨荷鍤成雲五
穀垂穎桑麻鋪荼東郊則有通溝大漕潰渭洞河泛舟

山東控引淮湖與海通波西郊則有上囿禁苑林麓藪澤陂池連乎蜀漢繚以周牆四百餘里離宮別館三十六所神池靈沼往往而在其中乃有九真之麟大宛之馬黃支之犀條枝之鳥踰崑崙越巨海殊方異類至于三萬里其宮室也體象乎天地經緯乎陰陽據坤靈之正位放太紫之圓方樹中天之華闕豐冠山之朱堂因瓊材而究奇抗應龍之虹梁列栱檠以布翼荷棟桴而高驤雕玉瑱以居楹裁金壁以飾璫發五色之渥彩光

燭朗以景彰於是左城右平重軒三階閨房周通門闥
洞開列鐘虞於中庭立金人於端闈仍增崖而衡闕臨
峻路而啓扉徇以離宮別寢承以崇臺閒館煥若列宿
紫宮是環清涼宣溫神仙長年金華玉堂白虎麒麟區
宇若茲不可殫論增盤業峨登降炤爛殊形詭制每各
異觀乘茵步輦惟所息宴後宮則有掖庭椒房后妃之
室合歡增成安處常寧蒞若椒風披香發越蘭林蕙草
鴛鴦飛翔之列昭陽特盛隆於孝成屋不呈材牆不露

形裛以藻繡絡以綸連隨侯明月錯落其間金釭銜壁
是為列錢翡翠火齊流耀含英懸黎垂棘夜光在焉於
是玄墀釳砌玉階彤庭磨礧綵綴琳珉青熒珊瑚碧樹
周阿而生紅羅颯纚綺組繽紛精曜華燭俯仰如神後
宮之號十有四位窈窕繁華更盛迭貴處乎斯列者蓋
以百數左右庭中朝堂百寮之位蕭曹魏邴謀謨乎其
上佐命則垂統輔翼則成化流大漢之愷悌蕩亡秦之
毒螫故令斯人揚樂和之聲作畫一之歌功德著乎祖

宗膏澤洽乎黎庶又有天祿石渠典籍之府命夫惇誨
故老名儒師傅講論乎六藝稽合乎同異又有承明金
馬著作之庭大雅宏達於茲為羣元元本本殫見洽聞
啓發篇章校理秘文周以鉤陳之位衛以嚴更之署總
禮官之甲科羣百郡之廉孝虎賁贅衣闕尹閤寺陞戟
百重各有典司周廬千列徼道綺錯輦路經營修塗飛
閣自未央而連桂宮北彌明光而亘長樂陵塏道而超
西墉毘建章而連外屬設壁門之鳳闕上觚稜而棲金

爵內則別風嶢嶢眇麗巧而聳擢張千門而立萬戶順
陰陽以開闔爾乃正殿崔巍層構厥高臨乎未央經駘
盪而出馭娑洞杳詣以與天梁上反宇以蓋戴激日景
而納光神明鬱其特起遂偃蹇而上躋軼雲雨於大半
虹霓迴帶於芬楣雖輕迅與僛狡猶愕眙而不能階攀
井幹而未半目眩轉而意迷捨櫺檻而却倚若顛墜而
復稽魂怳怳以失度巡迴途而下低既懲懼於登望降
周流以彷徨步甬道以縈紆又杳窅而不見陽排飛閭

而上出若遊目於天表似無依而洋洋前唐中而後太
液覽滄海之湯湯揚波濤於碣石激神岳之將將濫瀛
洲與方壺蓬萊起乎中央於是靈草冬榮神木叢生巖
峻峭崿金石崢嶸抗仙掌以承露擢雙立之金莖軼埃
璫之混濁鮮顥氣之清英騁文成之丕誕馳五利之所
刑庶松喬之羣類時遊從乎斯庭實列仙之攸館非吾
人之所寧爾乃盛娛遊之壯觀奮大武乎上囿因茲以
威戎夸狄耀威靈而講武事命荊州使起烏詔梁野而

驅獸毛羣內闐飛羽上覆接翼側足集禁林而屯聚水
衡虞人修其營表種別羣分部曲有署罟網連紘籠山
絡野列卒周匝星羅雲布於是乘鑾輿備法駕帥羣臣
披飛廉入苑門遂繞鄴鄩厯上蘭六師發逐百獸駭殫
震震爚爚雷奔電激草木塗地山淵反覆蹂躪其十二
三乃拗怒而少息爾乃期門飲飛列刃攢鋌要趺追蹤
鳥驚觸絲獸駭值鋒機不虛掎弦不再控矢不單殺中
必疊雙颺颺紛紛矰繳相纏風毛雨血灑野蔽天平原

赤勇士厲猿狖失木豺狼懾竄爾乃移師趨險竝蹈潛
穢窮虎奔突狂兕觸蹶許少施巧秦成力折犄獬狡扼
猛噬脫角挫脰徒搏獨殺挾師豹拖熊螭曳犀犛頓象
羆超洞壑越峻崖蹶嶰巖巨石頽松柏仆叢林摧草木
無餘禽獸殄夷於是天子乃登屬玉之館歷長楊之榭
覽山川之體勢觀三軍之殺獲原野蕭條目極四裔禽
相鎮壓獸相枕藉然後收禽會衆論功賜胙陳輕騎以
行魚騰酒車以斟酌割鮮野食舉烽命爵饗賜畢勞逸

齊大輅鳴鑾容與徘徊集乎豫章之宇臨乎昆明之池
左牽牛而右織女似雲漢之無涯茂樹蔭蔚芳草被隄
蘭茝發色煜煜猗猗若摛錦與布繡燭耀乎其陂鳥則
玄鶴白鷺黃鵠鷓鴣鵠鵠鳬鷺鴻鴈朝發河海夕
宿江漢沈浮往來雲集霧散於是後宮乘輶輅登龍舟
張鳳蓋建華旗祛黼帷鏡清流靡微風澹淡浮耀女謳
鼓吹震聲激越管厲天鳥羣翔魚窺淵招白鷗下雙鵠
投文竿出比目撫鴻量御矰繳方舟竝驚俛仰極樂遂

乃風舉雲搖浮遊溥覽前乘秦嶺後越九峻東薄河華
西涉岐雍宮館所厯百有餘區行止朝夕儲不改供禮
上下而接山川究休佑之所用采遊童之歡謠第從臣
之嘉頌於斯之時都都相望邑邑相屬國藉十世之基
家承百年之業士食舊德之名氏農服先疇之畝畝商
循族世之所嚮工用高曾之規矩絜乎隱隱各得其所
若臣者徒觀迹於舊墟聞之乎故老十分未得其一端
故不能徧舉也

東都賦

東都主人喟然而歎曰痛乎風俗之移人也子實秦人
矜夸館室保界河山信識昭襄而知始皇矣烏覩大漢
之云為乎夫大漢之開元也奮布衣以登皇位由數耆
而創萬代蓋六籍所不能談前聖靡得而言焉當此之
時攻有橫而當天討有逆而順民故婁敬度勢而獻其
說蕭公權宜而拓其制時豈泰而安之哉計不得已
也吾子曾不是睹顧曜後嗣之末造不亦暗乎今將語

子以建武之治永平之事監于太清以變子之惑志往
者王莽作逆漢祚中缺天人致誅六合相滅于時之亂
生民幾亡鬼神泯絕壑無完柩郭罔遺室原野厭人之
肉川谷流人之血秦項之災猶不克半書契以來未之
或紀故下人號而上訴上帝懷而降監乃致命乎聖皇
於是聖皇乃握乾符闡坤珍披皇圖稽帝文赫然發憤
應若興雲霆擊昆陽憑怒雷震遂超大河跨北嶽立號
高邑建都河洛紹百王之荒屯因造化之盪滌體元立

制繼天而作系唐統接漢緒茂育羣生恢復疆宇勲兼
乎在昔事勤乎三五豈特方軌竝跡紛綸后辟治近古
之所務蹈一聖之險易云爾哉且夫建武之元天地革命
四海之內更造夫婦肇有父子君臣初建人倫寔始斯
乃伏羲氏之所以基皇德也分州土立市朝作舟輿造
器械斯乃軒轅氏之所以開帝功也龔行天罰應天順
人斯乃湯武之所以昭王業也遷都改邑有殷宗中興
之則焉即土之中有周成隆平之制焉不階尺土一人

之柄同符乎高祖克已復禮以奉終始允恭乎孝文憲
章稽古封岱勒成儀炳乎世宗按六經而校德眇古昔
而論功仁聖之事既該而帝王之道備矣至於永平之
際重熙而累洽盛三雍之上儀脩袞龍之法服鋪鴻藻
信景鑠揚世廟正雅樂人神之和允洽羣臣之序既肅
乃動大輅遵皇衢省方巡狩窮覽萬國之有無考聲教
之所被散皇明以燭幽然後增周舊脩洛邑扇巍巍顯
翼翼光漢京于諸夏總八方而為之極是以皇城之內

宮室光明闕庭神麗奢不可踰儉不能侈外則因原野
以作苑順流泉而為沼發蘋藻以潛魚豐圃草以毓獸
制同乎梁騶誼合乎靈囿若乃順時節而蒐狩簡車徒
以講武則必臨之以王制考之以風雅歷騶虞覽駟騏
嘉車攻采吉日禮官整儀乘輿乃出於是發鯨魚鏗華
鐘登玉輅乘時龍鳳蓋琴麗和鸞玲瓏天官景從稷威
盛容山靈護野屬御方神雨師泛灑風伯清塵千乘雷
起萬騎紛紜元戎竟野戈鋌彗雲羽旄掃霓旌旗拂天

焱焱炎炎揚光飛文吐爛生風欲野歎山日月為之奪
明丘陵為之搖震遂集乎中囿陳師案屯駢部曲列校
隊勒三軍誓將帥然後舉烽伐鼓申令三驅輕車霆激
驍騎電驚由基發射范氏施御弦不睨禽轡不詭遇飛
者不及翔走者不及去指顧倏忽獲車已實樂不極盤
殺不盡物馬踰餘足士怒未淅先驅復路屬車按節於
是薦三犧效五牲禮神祇懷百靈覲明堂臨辟雍揚緝
熙宣皇風登靈臺考休徵俯仰乎乾坤參象乎聖躬目

中夏而布德瞰四裔而抗稜西盪河源東澹海濶北動
幽崖南曜朱垠殊方別區界絕而不隣自孝武之所不
征孝宣之所未臣莫不陸訾水慄奔走而來賓遂綏哀
牢開永昌春王三朝會同漢京是日也天子受四海之
圖籍膺萬國之貢珍內撫諸夏外綏百蠻爾乃盛禮興
樂供帳置乎雲龍之庭陳百僚而贊羣后究皇儀而展
帝容於是庭實千品旨酒萬鍾列金罍班玉觴嘉珍御
太牢饗爾乃食舉雍徹太師奏樂陳金石布絲竹鐘鼓

鏗鉤管絃煒煜抗五聲及六律歌九功舞八佾韶舞備
泰古畢四夷間奏德廣所極傑侏毘離罔不具集萬樂
備百禮暨皇歡浹羣臣醉降烟煴調元氣然後撞鐘告
罷百寮遂退於是聖上覩萬方之歡娛又沐浴於膏澤
懼其侈心之將萌而怠於東作乃申舊章下明詔命有
司班憲度昭節儉示太素去後宮之麗飾損乘輿之服
御抑工商之淫業興農桑之盛務遂令海內棄末而反
本背偽而歸真女脩織紉男務耕耘器用陶匏服尚素

玄恥纖靡而不服賤奇麗而不珍捐金於山沈珠於淵
於是百姓滌瑕盪穢而鏡至清形神寂寞耳目不營嗜
慾之源滅廉恥之心生莫不優游而自得玉潤而金聲
是以四海之內學校如林庠序盈門獻酬交錯俎豆革
革下舞上歌蹈德詠仁登降飫宴之禮既畢因相與嗟
歎玄德謹言弘說咸舍和而吐氣頌曰盛哉乎斯世今
論者但知誦虞夏之書詠殷周之詩講義文之易論孔
氏之春秋罕能精古今之清濁究漢德之所由唯子頗

識舊典又徒馳騁乎末流溫故知新已難而知德者鮮
矣且夫僻界西戎險阻四塞脩其防禦孰與處乎土中
平夷洞達萬方輻湊秦嶺九巒涇渭之川曷若四瀆五
嶽帶河汴洛圖書之淵建章甘泉館御列仙孰與靈臺
明堂統和天人太液昆明鳥獸之囿曷若辟雍海流道
德之富游俠踰侈犯義侵禮孰與同履法度翼翼濟濟
子徒習秦阿房之造天而不知京洛之有制識函谷之
可關而不知王者之無外主人之辭未終西都賓矍然

失容逡巡降階悚然意下捧手欲辭主人曰復位今將授子五篇之詩賓既卒業乃稱曰美哉乎斯詩義正乎揚雄事實乎相如匪唯主人之好學蓋乃遭遇乎斯時小子狂簡不知所裁既聞正道請終身而誦之其詩曰

明堂詩

於昭明堂明堂孔陽聖皇宗祀穆穆煌煌上帝宴饗五位時序誰其配之世祖光武普天率土各以其職猗歟緝熙允懷多福

辟雍詩

乃流辟雍辟雍湯湯聖皇莅止造舟為梁皤皤國老乃
父乃兄抑抑威儀孝友光明於赫太上示我漢行洪化
惟神永觀厥成

靈臺詩

乃經靈臺靈臺既崇帝勤時登爰考休徵三光宣精五
行布序習習祥風祁祁甘雨百穀蓁蓁庶草蕃廡屢惟
豐年於皇樂胥

寶鼎詩

嶽脩貢兮川效珍吐金景兮歆浮雲寶鼎見兮色紛紜
煥其炳兮被龍文登祖廟兮享聖神昭靈德兮彌億年

白雉詩

啓靈篇兮披瑞圖獲白雉兮效素烏嘉祥阜兮集皇都
發皓羽兮奮翹英容潔朗兮於淳精彰皇德兮侔周成
永延長兮膺天慶

幽通賦

系高項之玄冑兮氏中葉之炳靈
颯凱風而蟬蛻兮雄朔野以颺聲
皇十紀而鴻漸兮有羽儀於上京
巨滔天而泯夏兮考邁愍以行謠
終保已而貽則兮里上仁之所廬
懿前烈之純淑兮窮與達其必濟
咨孤蒙之眇眇兮將圯絕而罔階
豈余身之足殉兮違世業之可懷
靖潛處以永思兮經日月而彌遠
匪黨人之敢拾兮庶斯言之不玷
魂煢煢與神交兮精誠發於宵寐
夢登山而迥眺兮覲幽人之髣髴
攬葛藟而授余兮眷峻谷曰勿

墜眴眴寤而仰思兮心矇矇猶未察黃神邈而靡質兮
儀遺識以臆對曰乘高而還神兮道遐通而不迷葛縣
縣於樛木兮詠南風以為綏蓋惴惴之臨深兮乃二雅
之所祇既訊爾以吉象兮又申之以炯戒盍孟晉以迨
羣兮辰儵忽其不再承靈訓其虛徐兮佇盤桓而且俟
惟天地之無窮兮鮮生民之晦在紛屯遭與蹇連兮何
艱多而知寡上聖迂而後拔兮豈羣黎之所禦昔衛叔
之御昆兮昆為寇而喪予管彎弧欲斃讎兮讎作后而

成已變化故而相詭兮孰云預其終始雍造怨而先賞
兮丁因惠而被戮栗取弔于由吉兮王膺慶於所感叛
迴穴其若茲兮北叟頗識其倚伏單治裏而外凋兮張
脩褫而內逼聿中和為庶幾兮顏與冉又不得溺招路
以從已兮謂孔氏猶未可安惱惱而不能兮卒隕身乎
世禍遊聖門而靡救兮雖覆醢其何補固行行其必凶
兮免盜亂為賴道形氣發于根柢兮柯葉彙而靈茂恐
罔兩之責影兮羌未得其云已黎淳耀于高辛兮羊彊

大於南汜羸取威於百儀兮姜本支乎三趾既仁得其
信然兮仰天路而同軌東鄰虐而殲仁兮王合位乎三
五戎女烈而喪孝兮伯祖歸於龍虎發還師以成命兮
重醉行而自耦震鱗聚于夏庭兮匝三正而滅姬異羽
化乎宣宮兮彌五辟而成災道修長而世短兮夏冥默
而不周胥仍物而鬼譏兮乃窮宙而達幽媯巢姜於孺
筮兮旦筭祀于契龜宣曹興敗於下夢兮魯衛名謚於
銘謠妣聆呱而刻石兮許相理而鞠條道混成而自然

兮術同原而分流神先心以定命兮命隨行以消息
兮流遷其不濟兮故遭罹而羸縮三樂同于一體兮雖移
易而不忒洞參差其紛錯兮斯衆兆之所惑周賈盪而
貢憤兮齊歿生與禍福抗爽言以矯情兮信畏犧而忌
鵬所貴聖人之至論兮順天性而斷誼物有欲而不居
兮亦有惡而不避守孔約而不貳兮乃輔德而無累三
仁殊於一致兮夷惠異而齊聲木偃息以蕃魏兮申重
繭以存荆紀焚身以衛上兮皓頤志而弗傾候草木之

區別兮苟能實其必榮要沒世而不朽兮乃先民之所
程觀天網之紘覆兮實棐謨而相訓謨先聖之大猷兮
亦隣德而助信虞韶美而儀鳳兮孔忘味於千載素文
信而底麟兮漢賔祚於異代精通靈而感物兮神動氣
而入微養流睇而猿號兮李虎發而石開非精誠其焉
通兮苟無實其孰信操末伎猶必然兮矧耽躬於道真
登孔昊而上下兮緯羣龍之所經朝貞觀而夕化兮猶
諱已而遺形若肩彭而偕老兮訴來哲而通情亂曰天

造草昧立性命兮復心弘道惟賢聖兮渾元運物流不
處兮保身遺名民之表兮舍生取誼亦道用兮憂傷天
物忝莫痛兮皓爾太素曷渝色兮尚越其幾淪神域兮

終南山賦

伊彼終南巋嶭嶙峋困樑青宮觸紫宸嶽峯鬱律萃于霞
芬暖暉晻霭若鬼若神傍吐飛瀨上挺修林元泉落落
密陰沉沉榮期綺季此焉恬心三春之季孟夏之初天
氣肅清周覽八隅皇鸞鸞鸞警乃前驅爾其珍恠碧玉

挺其阿密房溜其巔翔鳳哀鳴集其上清水泌流注其
前彭祖宅以蟬蛻安期饗以延年唯至德之為美我皇
應福以來臻掃神壇以告誠薦珍馨以祈仙嗟茲介福
永終億年

覽海賦

余有事於淮浦覽滄海之茫茫悟仲尼之乘桴聊從容
而遂行馳鴻瀨以漂驚翼飛風而迴翔顧百川之分流
煥爛漫以成章風波薄其稟稟邈浩浩以湯湯指日月

以為表索方瀛與壺梁曜金璆以為闕次玉石而為堂
莫芝列於階路涌醴漸於中唐朱紫彩潤明珠夜光松
喬坐於東序王母處於西廂命韓衆與岐伯講神篇而
校靈章願結旅而自託因離世而高遊騁飛龍之駢駕
歷八極而迴周遂竦節而響應忽輕舉以神浮遵霓霧
之掩蕩登雲塗以凌厲乘虛風而體景超太清以增逝
麾天關以啓路闢閭闔而望余通王謁於紫宮拜太乙
而受符

遊居賦

夫何事於冀州聊託公以遊居歷九土而觀風亦哲人
之所虞遂發軔於京洛臨孟津而北厲想尚父之威武
號蒼兕而明誓既中流而歎息美周武之知性謀人神
以動作高烏魚之瑞命瞻淇澳之園林善綠竹之猗猗
望常山之峩峩登北嶽而高遊嘉孝武之乾乾親飾躬
於伯姬建封禪於岱宗瘞玄玉於此丘徧五岳與四瀆
觀滄海以周流鄙臣恨不及事陪後乘之下僚今匹馬

之獨征豈斯樂之足娛且休精於敝邑聊卒歲以須臾

竹扇賦

青青之竹形兆直妙華長竿紛寔翼杳篠叢生於水澤
疾風時時紛蕭颯削為扇翼成器美託御君王供時有
度量異好有圓方來風辟暑致清涼安體定神達消息
百王傳之賴功力壽考康寧累萬億

表

為第五倫薦謝夷吾表

臣聞堯登稷契治隆太平舜用皋陶政致雍熙殷周雖有高宗昌發之君猶賴傳說呂望之策故能克崇其業允協大中竊見鉅鹿太守會稽謝夷吾出自東州厥土塗泥而英資挺特奇偉秀出才兼四科行包九德仁足濟時知周萬物加以少膺儒雅韜含六籍推考星度綜校圖錄探賾聖秘觀變歷徵占天知地與神合契據其道德以經王務昔為陪隸與臣從事奮忠義之操躬史魚之節董臣嚴剛勗臣懦弱得以免戾寔賴厥勲及其

應選作宰惠數百里降福彌異流化若神爰牧荊州威
行邦國奉法作政有周召之風居儉履約紹公儀之操
尋功簡能為外臺之表聽聲察實為九伯之冠遷守鉅
鹿政合時雍德量績謀有伊呂管晏之任闡弘道與同
史蘇京房之倫雖密勿在公而身出心隱不殉名以求
譽不馳騖以要寵念存遜遁演志箕山方之古賢實有
倫序採之於今超然絕俗誠社稷之元龜大漢之棟甍
宜當拔擢使登鼎司上令三辰順軌於厯象下使五品咸

訓於嘉時必致休徵克昌之慶非徒循法奉職而已臣以
頑駑器非其儔尸祿負乘夕惕若厲願乞骸骨更授夷吾
上以光七曜之明下以厭率土之望庶令微臣塞咎免悔
奏記

奏記東平王蒼

將軍以周召之德立乎本朝承休明之策建威靈之號
昔在周公今也將軍詩書所載未有三此者也傳曰必
有非常之人然後有非常之事有非常之事然後有非

常之功固幸得生於清明之世豫在視聽之末私以螻
螳竊觀國政誠美將軍擁千載之任躡先聖之蹤體弘
懿之姿據高明之執博貫庶事服膺六藝白黑簡心求
善無厭採擇狂夫之言不逆負薪之議竊見幕府新開
廣延羣俊四方之士顛倒衣裳將軍宜詳唐殷之舉察
伊臯之薦令遠近無偏幽隱必達期於總攬賢才收集
明智為國得人以寧本朝則將軍養志和神優游廟堂
光名宣於當世遺烈著於無窮竊見故司空掾桓梁宿

儒盛名冠德州里七十從心行不踰矩蓋清廟之光輝
當世之俊彥也京兆祭酒晉馮結髮修身白首無違好
古樂道玄默自守古人之美行時俗所莫及扶風掾李
育經明行著教授百人客居杜陵茅室土階京兆扶風
二郡更請徙以家貧數辭病去溫故知新論議通明廉
清修潔行能純備雖前世名儒國家所器韋平孔翟無
以加焉宜令考績以叅萬事京兆督郵郭基孝行著於
州里經學稱於師門政務之績有絕異之效如得及明

時秉事下僚進有羽翮奮翔之用退有杞梁一介之死
涼州從事王雍躬卞嚴之節文之以術藝涼州冠蓋未
有宜先雍者也古周公一舉則三方怨曰奚為而後已
宜及府開以慰遠方弘農功曹史殷肅達學洽聞才能
絕倫誦詩三百奉使專對此六子者皆有殊行絕才德
隆當世如蒙徵納以輔高明此山梁之秋夫子所為歎
也昔卞和獻寶以離斷趾靈均納忠終於沈身而和氏
之璧千載垂光屈子之篇萬世歸善願將軍隆照微之

明信日昃之聽少屈威神咨嗟下問令塵埃之中永無

荆山汨羅之恨

殷肅固集作段六子惟李育見後漢儒林傳育字元春扶風漆人仕為博士選

侍中擁一作膺斷趾作折趾沈身下一有已字歸善一作彌章

牋

與竇憲牋

六首

今月中舍以令賜固刀把曰此大將軍少小時所服今

賜固伏念大恩且喜且慙

又

將軍哀憐賜以玉躬所喜駭犀玳瑁簪絳單衣以魯縞
之質被服鸞鳳之彩飾

尺牘遺
鳳字

又

將軍哀憐賜固手迹告以中軍宜鮮明乃賜以瑇瑁簪

絳紗單衣

又

固於張掖縣受賜虎頭繡鞞囊一雙

又

復賜犀毗金頭帶此將軍所自帶也

又

將軍憐固乃賜以玉躬所著璚瑁襪三具

書

與弟超書

九首

傳武仲以能屬文為蘭臺令史下筆不能自休

又

徐幹字伯章扶風平陵人官至班超軍司馬善章草固與超書稱之

得伯章書藁勢殊工知識讀之莫不歎息實亦藝中已

立名自人成

又

竇侍中遺仲升楚騰陵錯橫刀璫早削一枚金錯半垂
刀一枚

又

竇侍中令載雜綵七百疋市月氏馬蘇合香

又

竇侍中前寄人錢八十萬市得雜罽十餘張也

又

月支氍毹大小相雜但細好而已

又

今賁白素三百疋欲以市月支馬蘇合香闌登

又

遺仲升虎頭金鞞囊金鈎

又

今遺仲升璚瑁黑犀簪

與陳文通書

奉國威靈信志方外

議

匈奴和親議

竊自惟思漢興以來曠世歷年兵纏夷狄尤事匈奴綏
御之方其塗不一或修文以和之或用武以征之或卑
下以就之或臣服而致之雖屈伸無常所因時異然未
有拒絕棄放不與交接者也故自建武之世復修舊典

數出重使前後相繼至於其末始乃暫絕永平八年復
議通之而廷爭連日異同紛回多執其難少言其易先
帝聖德遠覽瞻前顧後遂復出使事同前世以此而推
未有一世闕而不修者也今烏桓就闕稽首譯官康居
月氏自遠而至匈奴離析名王來降三方歸服不以兵
威此誠國家通於神明自然之徵也臣愚以為宜依故
事復遣使者上可繼五鳳甘露致遠人之會下不失建
武永平羈縻之義虜使再來然後一往既明中國主在

忠信且知聖朝禮義有常豈可逆詐示猜孤其善意乎
絕之未知其利通之不聞其害設後北虜稍彊能為風
塵方復求為交通將何所及不若因今施惠為策近長

符命

典引

有序
蔡邕註

臣固言永平十七年臣與賈逵傅毅杜矩展隆郝萌等
召詣雲龍門小黃門趙宣持秦始皇帝本紀問臣等曰
太史遷下贊語中寧有非邪臣對此贊賈誼過秦篇云

向使子嬰有庸主之才僅得中佐秦之社稷未宜絕也
此言非是即召臣入問本聞此論非邪將見問意開寤
耶臣具對素聞知狀詔因曰司馬遷著書成一家言揚
名後世至以身陷刑之故反微文刺譏貶損當世非誼
士也司馬相如誇行無節但有浮華之詞不周於用至
於病疾而遺忠主上求取其書竟得頌述功德言封禪
事忠臣效也至是賢遷遠矣臣固常伏刻誦聖論昭明
好惡不遺微細緣事斷誼動有規矩雖仲尼之因史見

意亦無以加臣固被學最舊受恩浸深誠思畢力竭情
昊天罔極臣固頓首頓首伏惟相如封禪靡而不典揚
雄美新典而亡實然皆游揚後世垂為舊式臣固才朽
不及前人蓋詠雲門者難為音觀隨和者難為珍不勝
區區竊作典引一篇雖不足雍容明盛萬分之一猶啓
發憤懣覺悟童蒙光揚大漢軼聲前代然後退入溝壑
死而不朽臣固愚戇頓首頓首曰

太極之元兩儀始分烟烟煜煜

易太極是生兩儀烟烟煜煜陰陽和一相扶貌

也有沈而興有浮而清

興濁也言兩儀始分之時其氣和同沈而濁者為地浮而清者

為天沈浮交錯庶類混成

地體沈而氣升天道浮而氣降升降交錯則衆類同矣

肇

命民主五德初起

民主者天子也尚書曰成湯簡代夏作民主五德五行之德自伏羲已下

帝王相代各據其一行始於木終於水則復始也

同于草昧玄混之中

易曰天造草昧

混猶濁踰繩越契寂寥而亡詔者系不得而綴也

言結繩書契已

往其道寂寥無聲莫能以相告故易系不得綴連也綴知銳切

厥有氏號紹天闡繹莫

不開元於太昊皇初之首上哉夔乎其書猶可得而修

也

所依為氏也號功之表也號太昊曰伏羲炎帝曰神農黃帝曰軒轅少昊曰金天顓頊曰高陽帝嚳曰高

辛堯曰陶唐舜曰有虞紹天
闡繹宗紹天地開道人事

亞斯之世通變神化函光

而未曜若夫上稽乾則降承龍翼而炳諸典謨以冠德

卓絕者莫崇乎陶唐陶唐舍胤而禪有虞有虞亦命夏

后稷契熙載越成湯武股肱既周天迺歸功元首將授

漢劉

天有五行之序堯與四臣各據其一行而堯為之
正四臣已徧故歸功元首之子孫而授漢劉也高

祖始於沛公起兵入關後為漢王以即尊位故遂曰漢
也春秋左氏傳曰陶唐氏既衰其後劉累者在夏為御

龍氏在商為豕韋氏在周為唐杜氏成王滅唐宣王殺
杜伯杜伯之子隰叔奔晉其後士會奔秦而復歸其子

留秦者為劉氏以
是明之漢為堯後俾其承三季之荒末值亢龍之災孽

懸象闔而恒文乖藝倫數而舊章缺故先命玄聖使綴

學立制宏亮洪業表相祖宗贊揚迪哲

相助也始受命為祖繼中為宗

皆不毀廟之稱也言仲尼之作亦顯助祖宗揚明其迪詰之德

備哉粲爛真聖明之式

雖皋夔衡旦密勿之輔比茲編矣

茲孔子也

是以高光二聖

宸居其域

言高祖光武如北辰居其所而衆星共之

時至氣動乃龍見淵躍

拊翼而未舉則威靈紛紜海內雲蒸雷動電燁胡縊莽

分尚不涖其誅

言二祖即位胡亥王莽皆先已誅天之所為先除也

然後欽若上

下恭揖羣后正位度宗

度居也宗尊也言二主既除亂諸侯推而尊之然後敬順天地

恭揖諸侯正
位居尊也

有于德不台淵穆之讓

淵穆深美之辭也

靡號師

矢敦奮撫之容

矢陳也敦勉也毛氏曰矢於牧野

蓋以膺當天之正統

受克讓之歸運蓄炎上之烈精蘊孔佐之弘陳云爾

謂大

漢之德也蓄聚也

洋洋乎若德帝者之上儀誥誓所不及已

本

曰誥我事曰誓

鋪觀二代洪纖之度其贖可探也

洪大也纖細也

竝開

迹於一簣同受侯甸之服奕世勤民以方伯統牧乘其

命賜彤弧黃鉞之威用討韋顧黎崇之不恪

韋豕韋顧已姓之國

皆夏諸侯黎崇殷諸侯也湯文王誅之毛詩曰韋顧既伐又曰既伐于崇作邑於豐書曰西伯既戡黎

至

子參五華夏京遷鎬毫遂自北面虎螭其師革滅天邑

天邑天子邑也

是故誼士華而不敦武稱未盡護有慙德不其

然與

武周樂也護殷樂也孔子曰韶盡美矣又盡善也謂武盡美矣未盡善也舜禪而周代故未盡善也

延陵季子聘魯觀樂見舞大濩者曰聖人之弘也而猶有慙德恥於征伐也豈不然乎

亦猶於穆

猗那翕純皦繹

周頌曰於穆清廟商頌曰猗歟那歟孔子曰始作翕如也從之純如也皦如也

繹如也

以崇嚴祖考殷薦宗配帝發祥流慶對越天地者

對答也

烏奕乎千載豈不克自神明哉

烏奕光曜流行貌

誕略有

常審言行於篇籍光藻朗而不渝耳矧夫赫赫聖漢巍

魏唐基汭測其源乃先孕虞育夏甄殷陶周

言測度漢本至唐乃

任舜育禹化契成稷皆為之父母模範也

然後宣二祖之重光襲四宗之緝

熙宣徧也襲因也高祖光武為二祖孝文曰太宗孝武曰世宗孝宣曰中宗孝明曰顯宗二祖重光天下四

宗盛美相因而起也

神靈日照光被六幽

六幽謂上下四方也尚書曰光被四表格于上

下仁風翔乎海表威靈行乎鬼區

鬼區絕遠之區也

慝亡回而

不泯微胡瑣而不顧故夫顯定三才昭登之績匪堯不

興

言明定天地人之道明登天之功非堯莫能興也尚書曰昭登於上

鋪聞遺策在下之

訓匪漢不弘厥道至於經緯乾坤出入三光

言使日月星辰出以

其節入以其期亡胸
肫側匿盈縮之異也

外運渾元內霑豪芒性類循理品

物咸亨其已久矣盛哉皇家帝世德臣列辟功君百王

榮鏡宇宙尊亡與亢

四表曰宇往
古來今日宙

乃始虔輦勞謙兢兢

業業貶成抑定不敢論制作

輦亦
勞也

至於遷正黜色賓監

之事渙揚寓內

漢承周後當就夏正以十二月為年首
而秦以十月為年首高祖又以十月至

霸上因而不改至武帝太初始改焉賈誼公孫臣等議
以漢土德服色尚黃至光武中乃黜黃而尚赤立殷後
曰紹嘉公周後曰承休公以賓而監二代
矣於四者宣揚海內制作之事猶未章也而禮官儒林

屯用篤誨之士不傳祖宗之髣髴雖云優慎無乃憇與

於是三事岳牧之寮僉爾而進曰

慎而無禮則蕙

陛下仰監唐

典中述祖則俯蹈宗軌躬奉天經惇睦辨章之化洽巡

靖黎蒸懷保鰥寡之惠浹

懷安也保養也

燔瘞懸沈肅祇羣神

之禮備是以來儀集羽族於觀魏

貌恭體仁則鳳凰來儀

肉角馴

毛宗於外囿

視明禮修則麒麟來應

擾緇文皓質於郊

思肅信立則白虎擾

升黃輝采鱗於沼

聽德知正則黃龍見

甘露宵零於豐草

德至天則甘露

降

三足軒翥於茂樹

鳥反哺之鳥至孝之應也

若乃嘉穀靈草竒獸

神禽應圖合牒窮祥極瑞者朝夕垌牧

天子寮內也

日月邦

畿卓犖方州洋溢乎要荒昔周姬有素雉朱鳥玄秬黃
縻之事耳君臣動色左右相趨濟濟翼翼峨峨如也蓋
用昭明蚤畏承聿懷之福

毛詩曰昭事上帝聿懷多福

亦以寵靈文

武貽燕後昆覆以懿鑠豈其為身而有顯辭也若然受
之亦宜勤慤旅力以充厥道

慤思也旅陳也

啓恭館之金騰御

東序之秘寶以流其占

恭館宗廟金騰之所在東序牆也尚書曰顓頊河圖雉書在東

序流演也雉書皆存亡之事
當覽之以演禍福之驗也

夫圖書亮章天哲也

亮信也章

明也言河圖洛書至信至明
而出天賜之使視而行之

孔繇先命聖孚也

繇道也言孔子

先定道誠
至信也

體行德本正性也

體行正性習堯所履今天子復蹈之

逢吉丁

辰景命也

言逢此吉當此時者皇天之天命也

順命以創制

易曰湯武革命順乎天應

乎因定以和神

治定作樂以和人神

答三靈之蕃祉展放唐之明

文茲事體大而允寤寐次於聖心瞻前顧後豈蔑清廟憚

勅天命也伊考自遂古乃降戾爰茲作者七十有四人

有不俾而假素罔光度而遺章今其如台而獨闕也是

時聖上固以垂精遊神苞舉藝文屢訪羣儒俞咨故老

與之斟酌道德之淵源肴覈仁義之林藪以望元符之

臻焉

斟酌飲也。有穀食也。肉曰肴，骨曰覈。水深曰淵。水本曰源。叢木曰林。澤無水曰藪。言六藝者，道德之

深本而仁，詛之叢藪也。天子與羣儒，故老斟酌肴覈而行，以天應之至也。詩曰：洞酌彼行潦。又曰：肴覈惟旅。

既感羣后之讜辭，又悉經五繇之碩慮矣。

讜，當也。經，常也。繇，占也。王

者巡狩，預卜五年，歲習其祥，習則行，不則修德而改卜。言天下已舉五卜之占而習吉也。將緝萬嗣

揚洪輝奮景炎

揚奮皆振布之意。

扇遺風播芳烈，久而逾新用。

而不竭，汪汪乎丕天之大律，其疇能亘之哉。唐哉皇哉，

皇哉唐哉。

言誰能竟此道，惟唐堯與漢漢與唐堯而已。

設難

答賓戲

有序

永平中為郎典校秘書專篤志於儒學以著述為業或
譏以無功又感東方朔揚雄自喻以不遭蘇張范蔡之
時曾不折之以正道明君子之所守故聊復應焉其辭
曰

賓戲主人曰蓋聞聖人有一定之論烈士有不易之分
亦云名而已矣故太上有立德其次有立功夫德不得
後身而特盛功不得背時而獨彰是以聖喆之治棲棲

遑遑孔席不暝墨突不黔由此言之取舍者昔人之上
務著作者前烈之餘事耳今吾子幸游帝王之世躬帶
紱冕之服浮英華湛道德轡龍虎之文舊矣卒不能據
首尾奮翼鱗振拔洿塗跨騰風雲使見之者影駭聞之
者響震徒樂枕經籍書紆體衡門上無所蒂下無所根
獨據意乎宇宙之外銳思於毫芒之內潛神默記絀以
年歲然而器不賈於當已用不效於一世雖馳辯如濤
波摛藻如春華猶無益於殿最也意者且運朝夕之策

定合會之計使存有顯號亡有美諡不亦優乎主人追
爾而笑曰若賓之言所謂見世利之華闇道德之實守
突與之熒燭未仰天庭而覩白日也曩者王塗蕪穢周
失其馭侯伯方軌戰國橫驚於是七雄虓闐分裂諸夏
龍戰虎爭游說之徒風馳電激竝起而救之其餘焱飛
景附雲煜其間者蓋不可勝載當此之時搦朽磨鈍鉏
刀皆能一斷是故魯連飛一矢而蹶千金虞卿以顧盼
而捐相印夫啾發投曲感耳之聲合之律度淫蠲而不

可聽者非韶夏之樂也因勢合變偶時之會風移俗易
乖迂而不可通者非君子之法也及至從人合之衡人
散之亡命漂說羈旅騁辭商鞅挾三術以鑽孝公李斯
奮時務而要始皇彼皆躡風塵之會履顛沛之勢據徼
乘邪以求一日之富貴朝為榮華夕為顛賴福不盈皆
禍溢於世凶人且以自悔况吉士而是賴乎且功不可
以虛成名不可以偽立韓設辯以徼君吕行詐以賈國
說難既遁其身乃囚秦貨既貴厥宗亦墜是以仲尼抗

浮雲之志孟軻養浩然之氣彼豈樂為迂濶哉道不可
以貳也方今大漢洒掃羣穢夷險芟荒廓帝紘恢皇綱
基隆於義農規廣於黃唐其君天下也炎之如日威之
如神函之如海養之如春是以六合之內莫不同源共
流沐浴玄德稟仰太和枝附葉著譬猶草木之植山林
鳥魚之毓川澤得氣者蕃滋失時者零落叅天地而施
化豈云人事之厚薄哉今吾子處皇代而論戰國曜所
聞而疑所覲欲從塋敦而度高乎泰山懷汎濫而測深

乎重淵亦未至也賓曰若夫鞅斯之倫衰周之凶人既
聞命矣敢問上古之士處身行道輔世成名可述於後
者默而已乎主人曰何為其然也昔者咎繇謨虞箕子
訪周言通帝王謀合神聖殷說夢發於傅巖周望兆動
於渭濱齊寧激聲於康衢漢良受書於邳垠皆俟命而
神交匪詞言之所信故能建必然之策展無窮之勲也
近者陸子優游新語以興董生下帷發藻儒林劉向司
籍辯章舊聞揚雄譚思法言太玄皆及時君之門闡究

先聖之壺與婆娑乎術藝之場休息乎篇籍之囿以全
其質而發其文用納乎聖德烈炳乎後人斯非其亞歟
若乃伯夷抗行於首陽柳惠降志而辱仕顏潛樂於簞
瓢孔終篇於西狩聲盈塞於天淵真吾徒之師表也且
吾聞之一陰一陽天地之方乃文乃質王道之綱有同
有異聖哲之常故曰慎修所志守爾天符委命供已味
道之腴神之聽之名其舍諸賓又不聞和氏之璧韞於
荆石隋侯之珠藏於蚌蛤乎歷世莫眊不知其將舍景

曜吐英精曠千戴而流光也應龍潛於潢汙魚鼃媒之
不覩其能奮靈德合風雲超忽荒而躡昊蒼也故夫泥
蟠而天飛者應龍之神也先賤而後貴者和隋之珍也
時暗而久章者君子之真也若乃牙曠清耳於管絃離
婁眇目於毫分逢蒙絕技於弧矢般輸摧巧於斧斤良
樂軼能於相馭烏獲抗力於千鈞和鵲發精於鍼石研
桑心計於無垠走亦不任厠技於彼列故密爾自娛於
斯文

難巖周

太古之世不車不舟陸足以游不棟不宇巢穴而處

頌

竇車騎北征頌

車騎將軍應昭明之上德該文武之妙姿蹈佐歷握輔
操翼肱聖上作主光輝資天心謨神明規卓遠圖幽冥
親率戎士巡撫疆城勒邊御之永設奮轡櫓之遠徑閔
遐黎之騷狄念荒服之不庭乃總三選簡虎校勒部隊

明誓號援謀夫於永言察武毅於俎豆取可杖於品象
拔所用於仄陋料資器使采用先務民儀響慕羣英影
附羗戎相率東胡爭驚不召而集未令而諭於是雷震
九原電曜高闕金光鏡野武旗冒蜺衝雞鹿超黃磧輕
選四縱所從莫敵馳颺疾踵蹊迹探梗莽採嶮斷溫
禺分尸逐電激私渠星流霰落名王交手稽顙請服乃
收其鋒鏃干鹵甲冑積象如丘阜陳閱滿廣野戢載連
百兩散數累萬億放獲驅拏揣城拔邑擒馘之倡九谷

謠譟響聒東夷埃塵戎域然而唱呼鬱憤未逞厥願甘
平原之酣戰矜訊捷之累筭何則上將崇至仁行凱易
弘濃恩降溫澤同庖廚之珍饌分裂室之纖帛勞不御
輿寒不施禪行無偏勤止無兼役性蒙識而懷戾順貳
者異而懦夫奮遂踰涿邪跨祈連籍庭蹈就彊獫狁
犇幽山超山河臨安侯軼焉居與嘒衍顧衛霍之遺迹
賅伊秩之所邈師橫驚而庶御士怫惛以爭先回萬里
而風騰劉殘寇於沂垠糧不賦而師贍役不重而備軍

行戎醜以禮教斡鴻校而昭仁文武炳其竝隆威德兼
而兩信清乾鈞之攸冒拓畿畧之所順橐弓鏃而戢戈
回雙麾以東運於是封燕然以隆高禮廣鞬以弘曠銘
靈陶以勒崇欽皇祇之祐貺宣惠氣盪殘風軻泰幽嘉
凝陰飛雪灑庶其雨洒淋榛枯闕握興嘉卉始濃土膏
含養四行分任於是三軍稱曰疊疊將軍克廣德心光
光神武弘昭德音超兮眇天潛眇兮與神參

東巡頌

竊見巡狩岱宗柴望山虞崇祀明堂上稽帝堯中述世
宗遵奉世祖禮儀備具動自聖心是以明神屢應休徵
乃降不勝狂簡之情謹上岱宗頌一篇

曰若稽古在漢迪哲聿修厥德憲章丕烈翽六龍較五
輅齊百僚陶質素命南重以司厯厥中月之六辰備天
官之列衛盛輿服而東巡

南巡頌

惟漢再受命系葉十一協景和則天經郊高宗光六幽

通神明既禘祖於西都又將袷于南庭是時聖上運天
官之法駕建日月之旃旌

銘

封燕然山銘

有序

維永元元年秋七月有漢元舅曰車騎將軍竇憲寅亮
聖皇登翼皇室納于大麓惟清緝熙乃與執金吾耿秉
述職巡禦治兵於朔方鷹揚之校螭虎之士爰該六師
暨南單于東胡烏桓西戎氐羌侯王君長之羣驍騎十

萬元戎輕武長轂四分雷輜蔽路萬有三千餘乘勒以
八陣莅以威神玄甲輝日朱旗絳天遂凌高闕下雞鹿
經磧鹵絕大漠斬溫禺以釁鼓血尸逐以染鍔然後四
校橫徂星流彗掃蕭條萬里野無遺寇於是域滅區殫
反旆而旋考傳驗圖窮覽其山川遂踰涿邪跨安侯乘
燕然躡冒頓之區落焚老上之龍庭將上以攄高文之
宿憤光祖宗之玄靈下以安固後嗣恢拓境宇振大漢
之天聲茲可謂一勞而久逸暫費而永寧也乃遂封山

刊石昭銘盛德其辭曰

鑠王師兮征荒裔勦凶虐兮截海外

右叶志韻

奠其邈兮亘

地界

叶居吏反

封神丘兮建隆嵒

其例反與碣同

熙帝載兮振萬世

高祖沛泗水亭碑銘

皇皇聖漢兆自沛豐乾降著符精感赤龍承眈流裔襲
唐末風寸天尺土無埃斯亭建號宣基維以沛公揚威
斬蛇金精摧傷涉關陵郊係獲秦王應門造勢斗壁納
忠天期乘祚受爵漢中勒陳東征剡擒三秦靈威神佑

鴻溝是乘漢軍改歌楚衆易心誅項討羽諸夏以康陳
張畫策蕭勃翼終出爵褒賢裂土封功炎火之德彌光
以明源清流潔本盛末榮叙將十八贊述股肱休勛顯
祚永永無疆國寧家安我君是升根生葉茂舊邑是仍
於皇舊亭苗嗣是承天之福祐萬年是興

十八侯銘

鄼侯蕭何

兢兢相國弘策不追御國維綱秉統樞機文昌四友漢

有蕭何序功第一受封于鄼

將軍舞陽侯樊噲

歟歟將軍威蓋不當操盾千鈞拔主項堂興漢破楚矯
矯忠良卒為丞相帝室以康

將軍留侯張良

赫赫將軍受兵黃石規圖勝負不出帷幄令惠瞻仰安
金正朔國師是封光榮舊宅

太尉絳侯周勃

懿懿太尉醇厚朴誠輔翼受命應節御營厯位卿相土
國兼并見危致命社稷以寧

將軍平陽侯曹參

蹇蹇相國允忠克誠臨危處險安而匡傾興代之際濟
主立名身履國土秉御乾楨

丞相戶牖侯陳平

洋洋丞相勢譎師旅擾攘楚魏爲漢謀主六奇解厄揚
名于後

南宮侯張敖

堂堂張敖耳之遺萌以誠佐國序跡建忠功成德立襲封南宮垂號萬春永保無疆

衛尉曲陽侯酈商

衍衍衛尉德行循規遭兄食其隕歿於齊橫恥愧景刎頸自獻金紫褒表萬世不刊

將軍潁陽侯灌嬰

煌煌將軍輔漢久長威震呂氏姦惡不揚寇攘殄盡躬

迎代王功顯帝室萬世益章

將軍汝陰侯夏嬰

斌斌將軍鷹武是揚內康王室外鎮四方諸夏又安流
及要荒聲騁海內苗嗣紀功

將軍陽陵侯傳寬

休休將軍如虎如羆御師勒陳破敵以威靈金曜楚火
流烏飛將軍仗節功績永垂

將軍信武侯靳歙

斤斤將軍忠信孔雅出身六師十二匹旅折衝扞難遂
寧天下金龜章德建號傳後

丞相安國侯王陵

明明丞相天賦挺直剛德正行不枉不曲功業成著榮
顯食邑距呂奉主昭然不惑

將軍襄平侯韓信

桓桓將軍輔主克征奉使全璧身出項營序功差德履
讓以平轉北而遊雲中以傾

將軍棘津侯陳武

巖巖將軍帶武佩威御雄乘險難困不違仇滅主定四海是楨功成食土德被遐邇

曲成侯蟲達

晏晏曲成輿從龍騰安危從主赤曜以升赫赫皇皇道彌光明惟德御國流及後萌

御史大夫汾陰侯周昌

肅肅御史以武以文相趙距呂志安君身徵詣行所如

意不全天秩邑土勛乃永存

將軍青陽侯王吸

邑邑將軍育養丞徒建謀正直行不匿邪入軍討敵項
定天都佩雀雙印百里為家

論

難莊論

衆人之逐世利如青蠅之赴肉汁也青蠅嗜肉汁而忘
溺死衆人貪世利而陷罪禍

功德論

朱軒之使鳳舉於龍堆之表

哀辭

馬仲都哀辭

并序

北堂書鈔載班固馬仲都哀辭按此不似固自序似人為序其事也

車騎將軍順文侯馬仲都明帝舅也從車駕於水浮橋
馬驚入水溺死帝顧謂侍御史班固於馬上三十步遂

為哀辭

闕

連珠

擬連珠 五首

臣聞公輸愛其斧故能妙其功明主貴其士故能成其治

臣聞良匠度其材而成大厦明主器其士而建功業
臣聞聽決價而資王者無楚和之名因近習而取士者
無伯王之功故璵璠之為寶非駟儉之術伊呂之為佐
非左右之舊

臣聞鸞鳳養六翮以凌雲帝王乘英雄以濟民易曰鴻漸於陸其羽可用為儀

臣聞馬伏皐而不用則駑與良而為羣士齊寮而不職則賢與愚而不分

文

奕旨

大冠言博既終或進而問之曰孔子稱有博奕今博行於世而奕獨絕博義既弘奕義不述問之論家師不能

欽定四庫全書

漢魏六朝百三家集
卷十一

四八

說其聲可聞乎曰學不廣博無以應客北方之人謂棊
為奕弘而說之舉其大畧厥義深矣局必方正象地則
也道必正直神明德也棊有白黑陰陽分也駢羅列布
效天文也四象既陳行之在人蓋王政也成敗臧否為
仁由已危之正也夫博懸於投不專在行優者有不遇
劣者有僥倖踦拏相凌氣勢力爭雖有雄雌未足以為
平也至於奕則不然高下相推人有等級若孔氏之門
回賜相服循名責實謀以計策若唐虞之朝考功黜陟

器用有常施設無期因敵為資應時屈伸續之不復變
化日新或虛設豫置以自護衛蓋象庖義罔罟之制隄
防周起障塞漏決有似夏后治水之勢一孔有闕壞頽
不振有似瓠子汎濫之敗一棊破窒亡地復還曹子之
威作伏設詐突圍橫行田單之竒要厄相刼割地取償
蘓張之姿固本自廣敵人恐懼三分有二釋而不誅周
文之德知者之慮也既有過失能量弱強逡巡儒行保
角依旁却自補續雖敗不亡繆公之智中庸之方也上

有天地之象次有帝王之治中有五霸之權下有戰國之事覽其得失古今畧備及其晏也至於發憤忘食樂以忘憂推而高之仲尼概也樂而不淫哀而不傷質之詩書關雎類也純專知柔陰陽代至施之養性彭祖氣也外若無為默而識淨泊自守以道意隱居放言遠咎悔行象虞仲信可喜感乎大冠論未備故因問者喻其事

詩

郊祀靈芝歌

因露寢兮產靈芝
象三德兮瑞應圖
延壽命兮光此都
配上帝兮象太微
參日月兮揚光輝

詠史

三王德彌薄
惟後用肉刑
太倉令有罪
就逮長安城
自恨身無子
困急獨烹烹
小女痛父言
死者不可生
上書詣闕下
思古歌雞鳴
憂心摧折裂
晨風揚激聲
聖漢孝文帝
惻然感至情
百男何憤憤
不如一緹縈

竹扇詩

供時有度量異好有團方來風堪避暑靜夜致清涼

漢魏六朝百三家集卷十一

欽定四庫全書

漢魏六朝百三家集卷十二

漢崔駰集題詞

漢肅宗好崔亭伯文章稱於竇憲有真龍之目
憲遂揖為上客自古文人遭時遇主未或無因
而前趙良嬖人長卿狗監作合之始不辭汙泥
亭伯以四頌結知天子躬親薦達貴臣曳履迎
門其榮重亦百世一時也竇氏驕恣屢獻規誠

忤意見疎樂浪小邑竟長甘肥遯披其文詞十
過杜欽之說王鳳矣亭伯少與班傳齊名未遑
仕進時或譏其玄靜乃作違旨以匹解朝立言
之致初若符節及其終也子雲抱恨於投閣亭
伯成名於遼陰文之為文非言之難行之難也
崔氏顯人西漢代有崔發諂事王莽官至司空
崔篆羞之閉門滎陽重自傷悼而賦慰志言及
建新其耻同於氓詩之坭垣復關也亭伯處士

年少箴刺貴戚翻然高蹈無忝先子此之謂乎
何必銘昆吾之鼎勒景襄之鐘然後名得意哉

目錄

賦

反都賦

有序

大將軍西征賦

有序

大將軍臨洛觀賦

著述

達旨

書

與竇憲書

牋

與竇憲牋

又

又

箴

太尉諸箴

司徒箴

大理箴

虎賁中郎箴

河南尹箴

酒箴

銘

仲山父鼎銘

車左銘

車右銘

車後銘

樽銘

襪銘

縫銘

刀劍銘

又

刻漏銘

六安枕銘

扇銘

頌

上四巡頌表

西巡頌

有序

南巡頌

有序

東巡頌

北巡頌

漢明帝頌

北征頌

杖頌

議

章帝謚議

論

博徒論

又

七

七依

雜文

婚禮結言

詩

安封侯詩

七言詩

漢魏六朝百三家集卷十二目錄

欽定四庫全書

漢魏六朝百三家集卷十二

明 張溥 輯

漢崔駰集

賦

反都賦

有序

漢歷中絕京師為墟光武受命始遷洛都客有陳西土之富云洛邑褊小故畧陳禍敗之機不在險也

建武龍興奮旅西驅虜赤眉討高明斬銅馬破骨都收
翡翠之駕據天下之圖上帝受命將昭其烈潛龍初九
真人乃發上貫紫宮乘迴天闕掘狼狐蹈參伐陶以乾
坤始分日月觀三代之餘烈察殷湯之遺風背峻函之
固即周維之中興四郊建三雍禪梁父封岱宗

大將軍西征賦

有序

主簿駟言愚聞昔在上世義兵所克工歌其詩賢陳其
頌書之庸器列在明堂所以顯武功也

於是襲孟秋而西征跨雍梁而遠蹤陟隴阻之峻坂升
天梯以高翔旗旒翼如遊風羽毛紛其覆雲金光皓以
奪目武鼓鏗而雷震

大將軍臨洛觀賦

濱曲洛而立觀營高壤而作廬處崇顯以閒敞超絕鄰
而特居列阿閣以環匝表高臺而起樓步輦道以周流
臨軒楹以觀魚於是迎夏之首末春之垂桃枝夭夭楊
柳猗猗既乃日垂鹵陽中曜內光弛銜縱策逸如奔颺

著述

達旨

或說已曰易稱備物致用可觀而有所合故能扶陽以
出順陰而入春發其華秋收其實有始有極爰登其質
今之韞櫝六經服膺道術厯世而游高談有日俯鉤深
於重淵仰探遠乎九乾窮至賾於幽微測潛隱之無源
然下不步卿相之廷上不登王公之門進不黨以讚已
退不黷於庸人獨師友道德合符曩真抱景特立與士

不羣蓋高樹靡陰獨木不林隨時之宜道貴從凡於時
太上運天德以君世憲王僚而布官臨雍泮以恢儒疏
軒冕以崇賢率惇德以厲忠孝揚茂化以砥仁義選利
器於良材求鎔錙於明智不以此時攀台階闕紫闥據
高軒望朱闕夫欲千里而咫尺未發蒙竊惑焉故英人
乘斯時也猶逸禽之赴深林蝨蚋之趣大沛胡為嘿嘿
而久沉滯也答曰有是言乎子苟欲勉我以世路不知
其跌而失吾之度也古者陰陽始分天地初制皇綱亡

緒帝紀乃設傳序歷數三代興滅昔大庭尚矣赫胥罔
識淳樸散離人物錯乖高辛攸降厥趣各違道無常稽
與時張弛失仁為非得義為是君子通變各審所履故
士或掩目而淵潛或盥耳而山棲或草耕而僅飽或木
茹而長饑或重聘而不來或屢黜而不去或冒詢以干
進或望色而斯舉或以役夫發夢於王公或以漁父見
兆於元龜若夫紛纒塞路凶虐播流人有昏墊之厄主
有疇咨之憂條垂菑蔓上下相求於是乎賢人授手援

世之災跋涉赴俗急斯時也昔堯含感而臯陶謨高祖
歎而子房慮禍不散而曹絳奮結不解而陳平權及其
策合道從克亂弭衝乃將鏤玄珪冊顯功銘昆吾之冶
勒景襄之鍾與其有事則褰裳濡足冠挂不顧人溺不
拯則非仁也當其無事則躡纓整襟規矩其步德讓不
修則非忠也是以險則救俗平則守禮舉以公心不私
其體今聖上之育斯人也樸以皇質雕以唐文六合怡
怡比屋為仁壹天下之衆異齊品類之萬殊參差同量

坏冶一陶羣生得理庶績其凝家家有以樂和人人有
以自優威械藏而俎豆布六典陳而九刑厝濟茲兆庶
出於平易之路雖有力牧之畧尚父之厲伊臯不論奚
事范蔡夫廣厦成而茂木暢遠求存而良馬繫陰事終
而水宿藏場功畢而大火入方斯之際處士山積學者
川流衣裳被宇冠蓋雲浮譬猶衡陽之林岱陰之麓伐
尋抱不為之稀莢拱把不為之數悠悠罔極亦各有得
彼採其華我收其實舍之則藏已所學也故進動以道

則不辭執珪而秉柱國復靜以理則甘糟糠而安藜藿
夫君子非不欲仕也恥夸毗以求舉非不欲室也惡登
牆而樓處呌呼街鬻縣旌自表非隨和之寶也暴智燿
世因以干祿非仲尼之道也游不倫黨苟以徇已汗血
競時利合而友子笑我之沉滯吾亦病子屑屑而不已
也先人有則而我弗虧行有枉徑而我非隨臧否在予
唯世所議固將因天質之自然誦上哲之高訓詠太平
之清風行天下之至順懼吾躬之穢德勤百畝之不耘

繫余馬以安行俟性命之所存昔孔子起威於夾谷晏
嬰發勇於崔杼曹劌舉節於柯盟卞嚴克捷於彊禦范
蠡錯執於會稽伍員樹功於柏舉魯連辯言以退燕邑
胥單辭而存楚唐且華顛以悟秦甘羅童牙而報趙原
哀見廉於壺食宣孟收德於束脯吳札結信於丘木展
季効貞於門女顏回明仁於度轂程嬰顯義於趙武僕
誠不能編德於數者竊慕古人之所序

華嶠書曰駟譏揚雄以為范滂鄒衍之徒乘轡相傾
班固諸侯者也而云彼我異時又曰竊贊卓氏劉氏

細君斯皆士之贅行而云不能與此數公者同以為失類而改之也

書

與竇憲書

駟聞交淺而言深者愚也在賤而望貴者惑也未信而納忠者謗也皆所不宜而或蹈之者思効其區區憤盈而不能已也竊見足下體純淑之姿躬高明之量意美志厲有上賢之風駟幸得充下館序後陳是以竭其拳拳敢進一言傳曰生而富者驕生而貴者傲生富貴而

能不驕傲者未之有也今寵祿初隆百僚觀行當堯舜之盛世處光華之顯時豈可不庶幾夙夜以永衆譽弘申伯之美致周召之事乎語曰不患無位患所以立昔馮野王以外戚居位稱為賢臣近陰衛尉克已復禮終受多福邾氏之宗非不尊也陽侯之族非不盛也重侯累將建天樞執斗柄其所以獲譏於時垂愆於後者何也蓋在滿而不挹位有餘而仁不足也漢興以後迄於哀平外家二十保族全身四人而已書曰鑒于有殷可

不慎哉竇氏之興肇自孝文二君淳淑守道成名先日
安豐以佐命著德顯自中興內以忠誠自固外以法度
自守卒享祚國垂祉於今夫謙德之光周易所美滿溢
之位道家所戒故君子福大而愈懼位隆而益恭遠察
近覽俯仰有則銘諸几杖刻諸盤盂兢兢業業無殆無
荒如此則百福是荷慶流無窮矣

牋

與竇憲牋

主簿崔駰言今旦漢陽太守掾吏卒數十人皆臂鷹牽
狗陳於道側云欲上幕府駰聞傳曰禽獸之皮不足以
備器用其肉不可以將獻養則公不舉焉禮公侯非麋
兕射且以服猛為民除害因以登臨器械也故晉唐叔
射兕於徒林以為大甲夫鷹犬所獲不過雉兔而有歷
險阻之難斯乃細人匹夫之事非王侯大人所為要資
也駰幸得充下館序在衆賢後乘是以竭其惓惓敢進
一言

北堂書鈔載駰云主簿職在拾遺風夜致思智慮
淺短何益也文選注載奏記云珥筆持牘拜謁曹

下

與竇憲牋

南單于請兵北伐拜憲車騎將軍金印紫綬官屬依司空

君侯以野幕為府前世封青故事也

與竇憲牋

將軍窮絕天阻萬里長途

箴

太尉諸箴

天官冢宰庶僚之率師錫有帝命虞作尉爰叶台極安

平國域制軍詰禁王旅惟式九州用綏羣公咸治干戈
載戢宿纒其紀上之云據下之云戴苟非其人戮我帝
載昔周人思文公而召南詠甘棠昆吾隆夏伊摯盛商
李世頗僻禮用不匡無曰我強莫余敢喪無曰我大輕
戰好殺紂師百萬卒以不艾宰臣司馬敢告在際

司徒箴

天監在下仁德是興乃立司徒亂茲黎烝茫茫庶域率
土祁祁民具爾瞻四方是維乾乾夕惕靡怠靡違恪恭

爾職以勤王機敬敷五教九德咸事嗇人用章黜亡是
富無曰余恃忘余爾輔無曰余聖以忽執政匪用其良
乃荒厥命庶績不怡疚于爾祿豐其折右而鼎覆其餗
書歌股肱詩刺南山尹氏不堪國度斯憊徒臣司衆敢
告執藩

大理箴

邈矣皋陶翊唐作士設為犴狴九刑允理如石之平如
淵之清三槐九棘以質以聽罪人斯殛凶旅斯并熙乂

帝載旁施作明昔在仲尼哀矜聖人子罕禮刑衛人釋
艱釋之其忠勲亮孝文于公哀寡定國廣門簞哉邈矣
舊訓不遵主慢臣驕虐用其民賞以崇欲刑以肆忿紂
作炮烙周人滅殷夏用淫刑湯誓其軍衛鞅酷烈卒殞
于秦不疑加害禍不反身嗟茲大理慎于爾官賞不可
不思斷不可不虔或有忠能被害或有孝而見殘吳沉
伍胥殷割比干莫遂爾情是截是刑無遂爾心以速以
殛天鑒在顏無細不錄福善災惡其效甚速理臣思律

敢告執獄

虎賁中郎箴

赫矣帝臣爰奮厥武桓桓征夫矯矯其旅王師是成戎
事是禦惟鳥之鵠惟霆之發出翼王路入司階闡功成
閑邪憂其萌孽

河南尹箴

御覽作揚雄誤
西漢無河南尹

茫茫天區畫冀為京商邑翼翼四方是營唐虞商周河
洛是居成王郊廓以處鵠墟諸夏勁強是從是橫徹我

牆屋而師尹不匡霸奪其權宗器以分圖籍遷齊九鼎

入秦爰作卿士以尹王州風化攸興萬國承流

爰作四句太平

御覽案入秦下有

闕句一作之經

酒箴

豐侯沉酒荷翬負缶自戮於世圖形戒後

銘

仲山父鼎銘

鼎耳革其行塞雉膏不食方雨虧悔終吉有福足勝其

任公餗乃珍於高思危在滿戒溢可以永年天之大律

車左銘

三銘古文
苑作傳毅

虞夏作車取象璣衡君子建左法天之陽正位受綏車
不內顧塵不出軌鸞以節步彼言不疾彼指不躬玄覽

于道永思厥中

夏文苑
作氏

車右銘

擇御卜右採德用良詢納耆老于我是匡惟賢是師惟
道是式歲闕旅賁內顧自敕匪皇其度匪愆其則越戒

敦儉禮以華國

儉文苑
作約

車後銘

敬其在路體貌思恭望衡顧轂允慎茲容無或好失匪
盤于遊顧省厥遺虎尾斯求昭德塞違聊盈以無雖有

三晉歆然若虛

失音
逸

樽銘

惟歲之元朝賀奉樽金罍犧象嘉禮具存獻酬交錯萬

圖咸歡

圖古
國字

襪銘

機衡建子萬物含滋黃鍾育化以養元基長履景福至
于億年皇靈既祐祉祿來臻本枝萬世子子孫孫

縫銘

惟歲之始承天嘉德皇靈闕願闕國絲綏克贄以闕朝

迪

刀劍銘

歐冶運巧鑄鋒成鍔麟角鳳體玉飾金錯

又

龍淵太阿干將莫邪帶以自禦
燦燦吐花

刻漏銘

天德順動人以立信乃作斯策
以咸渥潤封傳今覽爰暨四極

六安枕銘

言六面皆安也

枕有規矩恭一其德承元寧躬終始不忒

扇銘